

PRAVILNIK O VRŠENJU NADZORA NAD PROVOĐENJEM ZAKONA O JEDINSTVENOM MATIČNOM BROJU

("Službeni glasnik Bosne i Hercegovine", br. 39/2002)

Član 1

Ovim pravilnikom propisuje se način vršenja nadzora nad provođenjem Zakona o jedinstvenom matičnom broju (u daljem tekstu: Zakon).

Član 2

Nadzor nad provođenjem Zakona vrši Ministarstvo civilnih poslova i komunikacija Bosne i Hercegovine, Ministarstvo unutrašnjih poslova Republike Srpske, ministarstva unutrašnjih poslova kantona u Federaciji Bosne i Hercegovine i nadležni organ Brčko Distrikta Bosne i Hercegovine, na način utvrđen ovim pravilnikom.

Član 3

Nadzor iz člana 2. ovog pravilnika vrši lice koje pismeno ovlasti ministar civilnih poslova i komunikacija Bosne i Hercegovine.

Nadzor u okviru nadležnosti organa u entitetima odnosno kantonima vrši lice ministarstva unutrašnjih poslova koje pismeno ovlasti rukovodilac koji rukovodi nadležnim ministarstvom.

Nadzor u okviru nadležnosti Brčko Distrikta Bosne i Hercegovine vrši lice koje pismeno ovlasti rukovodilac koji rukovodi tim organom.

Član 4

Lice iz člana 3. stav 1. ovog pravilnika nadzor vrši tako što kontroliše zakonitost upravnih akata i radnji odnosno primjenu Zakona i podzakonskih akata i s tim u vezi predlaže MCPK-a BiH da u okviru svojih nadležnosti ovo ministarstvo pokrene postupak ocjene zakonitosti upravnih akata, donese odgovarajuća uputstva i instrukcije i naloži preduzimanje određenih mjera i radnji radi otklanjanja uočenih nedostataka.

Član 5

U postupku primjene Zakona o jedinstvenom matičnom broju i podzakonskih akata iz ove oblasti lice iz člana 3. ovog pravilnika vrše nadzor i kontrolu rada nadležnih organa iz člana 3. Zakona.

Lice iz člana 3. stava 2. ovog pravilnika vrši nadzor i kontrolu rada nadležnih organa iz člana 3. Zakona u postupku primjene Zakona i podzakonskih akata iz ove oblasti.

Član 6

Ovlaštena lica iz člana 3. Pravilnika, zapisnik o izvršenom nadzoru dostavljaju rukovodiocu organa kod kojeg je nadzor izvršen.

Ovlaštena lica iz prethodnog stava i primjerak zapisnika sa predloženim mjerama dostavljaju rukovodiocima organa iz člana 2. Pravilnika radi upoznavanja sa zatečenim stanjem u cilju preduzimanja određenih mjera.

Član 7

Ovaj pravilnik stupa na snagu danom objavljivanja u "Službenom glasniku BiH".

Ovaj pravilnik će se objaviti i u službenim glasilima entiteta i Brčko Distrikta BiH.